

ISCARTA YA' SAN PABLO YATO TET YA' FILEMÓN

Yicheb'anil iscarta ya' Pablo

¹Hanin Pablo inti'an, ayinikojan preso yu walnik'ojan Istzoti' Komam Jesucristo.

Haninan yeb' juxhta Timoteo chikotz'ib'nhetojanh hune' carta ti' tawet wuxhta Filemón; xahan ayach juhanh, jetb'ipaxo kob'a yinh ismunil Komam Dios. ²Chikotz'ib'nhepaxtojanh tet ix janab' Apia, yeb'paxo tet ya' juxhta Arquivo, ya' kaw kolwa jinhanh yinh ismunil Komam Dios, yeb' tet sunil mak ayxako yul isq'ab' Komam Dios chiskutxb'a isb'a b'ey hawatut. ³Ha'ojab' Komam Dios Mame, yeb' Komam Jesucristo Jahawil chi'aq'ni isk'ulch'anil isk'ul, yeb' aq'ank'ulal teyet.

Isk'ulch'anil isk'ul ya' Filemón yeb' kaw ayko yanma ya' yinh Komam Dios

⁴Yet chintxahlihan tet Komam Dios hunta el, chaxhinnatijan, chi-waq'nihan yuch'andiosal tawinh tet Komam. ⁵Yuto xawab'ehan tato kaw xahan chawil makta yetxa Komam yehi, yeb' ta kaw ayko hawanma yinh Komam Jesús, Jahawil. ⁶Kaw chinq'anan tet Komam Dios ta ha' anma xayako isb'a yul isq'ab' Komam Jesucristo, yu chila ta ayko hawanma yinh Komam Dios, kaw chistxumiloj tato hanhk'anhe Komam Jesucristo chi'aq'ni isk'ulal jet. ⁷Wuxhtaj, kaw chintzalahan yeb' xin kaw chiyiq' yip wanmahan yu isk'ulch'anil hak'ul, yuto hawu yuxin xa'ischah makta yetxa Komam Dios yaq'lob'al yanma.

Tzotelto ya' Pablo yinh naj Onésimo tet ya' Filemón

⁸Haninti'an ischejab' Komam Jesucristo wehan, yuxin chu walnihan tawet b'aytet kaw yilal hawatx'eni. ⁹Yaja' haka' chu yay kosat koq'anni hunu tzet ye tu', hak tu' chu walnitojan tawet, yuto kaw xahan ayach wuhan. Hanin Pablo inti'an icham inxahan, kaw xin ayinikojan preso yu chiwalik'ojan Istzoti' Komam Jesucristo. ¹⁰Kaw chinokan inq'ana'an

tawet yinh naj Onésimo, naj ti' haka'tanhe ink'aholan ye naj, yuto ischah naj Komam Jesucristo yul yanma yet ayinikojan preso ti'.

¹¹Naj Onésimo ti',^a haka' hunu chejab' kaw matzet chi'oknikoj, hak tu' ye naj hawu yet yalanhtokanoj, yaja' wal tinanh xin kaw chi'oknoko naj hawu, haka' yu yokniko naj wuhan b'ey ti'. ¹²Wal tinanh chiwatojan naj tak'atanh hunelxa, k'ul chu hachahni naj, haka'ojtam haninan chin-hachahan. ¹³Wocheb'alan chikankano naj ink'atanhan yu inchejnihan naj, ha'ojtam xin hach chaxhinchejan selelo naj yulb'al ayiniktijan yul preso ti' yu Tzoti' K'ul yet Kolb'anile. ¹⁴Yaja' mach chisje ink'ulan in-watx'ehan hunu tzet ye tu' yalanhto maxhto chiwab'ehan tzet chawute hawalni, haxinwal hune' chinq'anan tawet ti' machojab' lanhb'iloj, wal xin yinchojab' hawanma chitita.

¹⁵Naj Onésimo ti', el naj hanik' tiempohal tak'atanh, yaja' yunhe is-meltzo naj tak'atanh yinh hunelnhe, ¹⁶yaja' matxa haka'o hunu chejab', wal xin kaw nimanobjab'xa yelapno naj yul hasat, haka' hunu juxhta kaw ocheb'il ju. Wal hinan kaw xahan ay naj wuhan b'ey ti', wal hachpaxo xin, ek'nahojab' xahan chawil naj. Machnhehojab'taj yu jet anmahil naj yuxin xahan chawil naj, wal xin to yu juxhtaxa naj yinh Komam Jesucristo.

¹⁷Yuxin ta kaw juxhtaxa kob'a yinh Komam chawab'e, chah naj ha-kojtam haninan chinapnihan tak'atanh. ¹⁸Tato ay hunu istx'ojal iswatx'e naj tawinh, maka ta ay isk'as naj tawet, teye wetan. ¹⁹Hanin Pablo inti'an hankawinan chintz'ib'nhetojan, tato ay isk'as naj tawet hani-nan chintohlahan, waxanhka xin chinnatijan tawet tato aypaxo hak'as wetan, yuto haninan walan Istzoti' Komam Jesucristo tawet yet hachahni Komam yul hawanma. ²⁰Hach wuxhtaj yije tzet chinq'anan tawet ti', yuto yuninalxa Komam Dios hawehi. Aq' yaq'lob'al wanmahan, yuto juxhtaxa kob'a yinh Komam Jesucristo.

²¹Chintz'ib'nhetojan hunteq'an ti' tawet yuto wohtajan tato kaw yijem hach, kaw wohtapaxojan tato ek'b'alto tzet chayije yib'anh tzet chi-waltoti'an. ²²Chiwalnipaxtojan tawet, chasay nino b'ay chinehan yet chinapnihan texol. Kaw xin chiwakojan yipo wanmahan ta yu chextxahli winhan tet Komam Dios, chi'el yinh isk'ul Komam intohan kexwilnojan.

Islahob'al iscarta ya' Pablo

²³Chalto juxhta Epafra ta chawil hab'a b'ey tu', ayko ya' preso winta-jan b'ey ti' yu yalnipaxik'o Istzoti' Komam Jesucristo. ²⁴Chalpaxto juxhta Marcos, juxhta Aristarco, juxhta Demas yeb' juxhta Lucas ta cheyil heb'a b'ey tu'; eb'ya' ti' wet munlawomalan yinh ismunil Komam Dios.

²⁵Ha'ojab' Komam Jesucristo Jahawil chi'anayo isk'ulch'anil isk'ul teyib'anh b'ey tu'.

^a 11 Hune' b'ihe Onésimo chal yelapnoj: *chi'oknikoj*.